



8. september 2022

UKA2022/46

Inatsisartut Suleriaasianni § 36 naapertorlugu apeqquteqaat aallaavigalugu oqallissiamut siunnersuut imaattoq matumuuna saqqummiuppara:

**Tunup namminerisamik kommuuningorsinnaanerata nalilernissaa pillugu apeqquteqaat aallaavigalugu oqallissiaq**

(Inatsisartunut Ilaasortaq Lars Poulsen, Siumut)

**Nunatta Kangia immikkut kommuuninngooqqissava?**

Naak tunumi aningasatigut aaqqiissuteqarnerit pissarsiaqarnarnerusut kommuunimiit isumagineqartaraluartut inuisa qanimut kissarlaartumik isumagineqarunnaarnerisa kinguneri ullumikkut atuupput. Aqquserngit putoqanngikkaluit, innuttaasut tillernerat qanimut kialartinneqanngippat najugaqarfik kipusooraluttuinnassaaq siunertaarullunilu.

Kommuunit namminersortumik ingerlasinnaanerat Siumup aallartinnerminiilli ataqqisaraa, taamaaginnarnissaalu Siumumit sulissutigiussavarput.

Siumup anguniagaraattaaq kommuunit aningasaqarnikkut suliassatigullu namminersortuunerisa ineriartortinnissaat, kommuuninik aaqqissusseqqinermi pilersaarasiaasimasut isumaqatigiissutilu nutaat naapertorlugit, tamannalu kommunerujussuanngortitsinermi ilaatigut tusiattumik piffinni arlalinni ingerlasimavoq, ilaannut allaat kipiluttunartorujussuanngorluni arlalippassuartigut. Piffitilaat pisinnaasaq sipporlugu ineriartupiloortinniakkat, ilaallu kinguussaasut.

Kommuunit ataatsimut kattussuutillugit Kommuunerujussuarnik pilersitsinerup kingorna paasinarsivoq Tasiilap Ittoqqortoormiillu Sermersup Kommuunianut ilaatinneqalernerat sorpassuartigut kangiani najugaqartunut nukillaarsaataasoq. Allaammi kommuunerujussuanngortitsinerit kingunericigut sulisut nuummut suliartorlutik nuunngikkunik atorfimmennik annasaqarnissaat piumasaqataasarsimavoq, tamakkuli aningasatigut nalunaarsuinermi takussutissiatut takuneqarsinnaanngillat, naak oqaatiginiarneqartaraluartoq tunumi kommuunitigut aningasaqarneq eqqarsaatigalugu atugarissaarnerusoqaleraluartoq.

Suna tamarmi tunumi kinguussaagaluttuinnarpoq, kinguussaagaluttuinnarnerullu kinguneraii suliffissaaleqinermi kisisisit qaffakkaluttuinnarneri, inissaaleqinerup annertusiartornera, minnerungitsumillu tunumi qangaaniilli kinaassuserisimasaq piorsarsimassuserlu tammariaartuinnartoq. Malunnangnitsumik piffimmik nungusaanermik kinguneqartussamik aqqummik ingerlatsivugut. Inuit qanimut inuppalaarneq isummanillu pingaartitsineq atorlugu sullissinngikkutta, piumassuseerunneq naleqartinneqannginnermullu misigissuseq pullartatut tuniluuttussatut pilersikkaluttuinnassavarput, allatut oqaatigalugu akisussaaffimmik piumassusermillu ipisaalluta.



Kommunerujussuarnik naleqqussaaqqissinnaaneq kommunerujussuarmi innuttaasut amerlanerussuteqartut piumasarippassuk, aammalu tamanna komunalbestyrelsip isumaqatigiittup piumasarippagu Siumup allannguiffiqeqataassallugu aaqqiissuteqarfigissallugulu piareersimaffigaa.

Nunatta kangia ineriartoqqittariaqarpoq, innuttaasut kinaassuseqarnerat nammineersinnaanerallu pingaartillugit anguneqaqqissappata. Innuttaasut qanumut sullinneqarnissartik pisariaqartippaat, pingartumillu tamat oqartussaaqataaneranni saaffiginninnerit sunniuteqaqataanissamullu kiffartunneqarnerit inornasaarneqartussaanngitsut uterteqqinnejartariaqarput. Innuttaasummi pillugit sulivugut, taakkuli mattussuuppagut inorsillugillu. Taamaammat Nunatta kangiata immikkut Kommuuningngortinissa Siumumit sulissutiginiarparput.

Siumumit qulakkeerniarparput kommunerujussuit ilumut innuttaasut akornanni pitsaanerpaamik sunniuteqarsinnaanersut, kommuunit tamarmik ataqtigiissakkamik namminerlu aamma pinngorartitsisinnaanerminnik immikkullarissinnaassusertik atorlugu ineriartortitsisinnaanissaat innuttaasuni naleqassutsip nukittoqqutaasullu siuarsartuarneqarnissaat aallaavigalugit.

Kommunerujussuarni inuussutissarsiornikkut ineriartortitsinissami tunngaviuvoq uumassusilinnik uumaatsunillu atorluaanerulernissarput. Kommunerujussuit namminneerlutik nunanik allanik suleqateqarnissamut periarfissatik naapertorlugit inuutissarsiornikkut allatigullu ineriartortitsinerminni suleqateqartarnerat pissusissamisoorpoq, tamassumalu aamma innuttaasunut pitsaaqtissanik ujartuiffingeqartuarnissa qulakkeerusupparput.

Ullumikkumulli kommuunerujussuit pilersinneqareernerisa kingorna inuussutissarsiutinik nutaanik pilersitsisoqarsimangnilaq, aningaasarsiorniarnerlu kipiluttunaqaaq, allaat illoqarfiiit arlallit immikkut kommuuniusimasut ullumikkut uninngaannalersimallutik, inuusuttunuttaaq allaat ineriartorluarnissamik periarfissaqartunut kingunerluuteqalersimalluni.

Kinguaariit nutaat tunumi periarfissaqartinneqassappata, inuusuttut ilinniarsimassutsikkut qaffassarnissaat pingaaruteqarluinnartutut Siumumiit isigaarput.

Kiffaanngissuseq, qanumut oqartussaaqataaneq, tamallu oqartussaaqataanerat innuttaasutut tunumi pigileqqittariaqarpagut. Aaqqissuussaaneq Tunumut naleqqussagaanngilluinnartoq Sermersuumit nuuginnavillugu atorneqarpoq innuttaasunit naammagittarfingineqaannartussatut inissinneqarluni. Tunumi pissutsit piviusut aallaavigalugit ingerlatsineq tulluussarneqarsinnaagaluarpat piviusormita qanoq ullumikkut isikkoqassagaluarpa? Kommunerujussuit eqqunneqarmata aaqqissuussinikkut kukkuneq inuiaqatigiinnut akisusimavoq piffissaatillugulu aaqqiiniarneq pisariaqarluinnarpoq, innuttaasullu atukkamikkut aaqqivigineqarasuarnissaat pisariaqarpoq.

Takornariaqarnikkut inuussutissarsiorsinnaanermut periarfissiinerit, aalisarnikkut inuussutissarsiornikkut periarfissiineq, niuerakkut torersumik orniginartumillu Pilersuisoq RAL-ilu suleqatiginerisigut aaqqissuussinernut periarfissiineq, kiisalu ilinniagaqarnikkut periarfissiinerit aqquissiuussinnaasariaqarpagut.

Qulaani eqaariikkakka tunngavigalugit politikkikkut tunumi iliuseqarfigisariaqakkat tassaapput:



- Kiffaanngissuseq uterteqqinneqartariaqarparput
- Qanimat oqartussaaqataaneq uterteqqittariaqarparput
- Tamat oqartussaaqataanerat nukittorsartariaqarparput

Oqallilluarnissassinnik kissaallusi.